

靈巖山人詩集

靈巖山人詩集目錄

第五卷 古今體詩

三山攬勝集

元默渚灘

辭家三首

春分

留別同社諸子

花下有感作

夜泛芙蓉湖

遊寄暢園

訪東林書院

艤舟亭

遊青山莊偶題

甘露寺

很石行

鶴林寺

招隱寺

舟中望焦山

焦山

海雲堂

焦山瘞鶴銘歌

焦山古鼎歌

舟行阻風金山登妙高臺放歌

金山

登金山寺塔

題呂仙閣壁

尋海嶽庵故址

贈彭明經晉賢

澤令

白門訪古集

登鍾山放歌

焉支井歌

周孝侯祠古柏行

臺城咏古四首

板橋行

過隨園訪袁太史子才

枚

先生不值二首

訪嚴冬友

雨花臺

莫愁湖

秦淮水榭雜詩二十首

馬湘蘭畫梅花便面歌

遊攝山詩二十首

湖上

明徵君祠

桃花澗

疊浪厓

千佛嶺

般若臺

紫峯閣

白雲庵

息心亭

德雲庵

幽居

禹王碑

萬松閣

春雨樓

雲木相參閣

茅庵

白鹿泉

鹿泉庵

瀑布

最高峯

最高峯望黃天蕩弔韓蘄王

龍潭

舟行

阻風

靈巖山人詩集卷五

鎮洋畢沅秋帆

一字懷蘅

三山攬勝集

元默涪灘

辭家三首

弱齡痛失怙恩勤仗母氏螢窗雪案間訓詁研經史餘功
課學詩風騷悟微旨長依我母懷螻伏甘老死發春豔陽
天花開雜紅紫挑燈縫征裳質釧整行李上堂聆慈訓牽
衣復長跪母云汝孤露英華當綺齒汝學已漸成寒門惟
汝恃我躬幸康彊速上春明里可以廣見聞可以交賢士
汝舅客保陽順道應省視家事易枝柱勿憂內顧矣兒聞

意倉皇暗淚滴不已問寢子心安遠遊親心喜出處兩難
兼別離從此始雞鳴早戒塗拜母伏不起寒燠時無常眠
餐慎調理母云兒女態丈夫勿爾爾學不爲求名名成實
在是回頭認親顏天涯隔尺咫黯黯紅燭光悠悠婁江水
孤舟夢歸時情景如斯耳

灼灼芙蕖華牽絲稱嘉耦荏苒歲載更閨中藉良友三吳
舊門望先業席豐厚結褵到寒家家祚中落後我母大歡
喜稱心得賢婦上堂捧槃巾入室操井臼多病孱弱質鍼
紆不釋手經營到殽榼辛勤任箕帚御下極整嚴臧獲免
諄詬小姑漸長成規導不離口硯山抱書廬雙扉掩月牖
私計忘有無盡篋自攜取萱堂甘旨謀靡弗宜左右今當

別君去家事資擔負臨岐涕雙落各各有老母時慰倚閭
情勿令傷懷抱叶綺陌柳花飛小園松濤吼青燈伴白頭
遊子長安走

同懷三弟兄頭角爭英特哀哀先君子奄棄遺弱息衰宗
鮮依倚門戶漸偪仄吾母隻手撐外侮亦孔亟傳家有藏
書少壯須努力遂爲延明師焚膏繼晷鬻釵償束脩典
衣供餽食書窗互切劘稍稍擴器識仲弟少多能遊藝工
粉墨季也性聰穎空虛妙鐫刻紛敷燦筆光七襄充組織
朝政合几硯夜臥同衾席聞我將遠遊悲悵悵離隔西郊
一尊酒執手那忍釋裴回復何言晨昏盡子職脩綆要深
汲分陰莫輕擲學海翻文瀾探源安有極花陰讀書聲能

悅親顏色

春分

漸欣清晝永不礙好春遲二月中旬後輕寒薄煖時小桃
初破萼新柳未垂絲休問陰晴異陰晴各自宜

留別同社諸子

落落孤蹤等繫匏吟壇幾輩奈投膠馬思逐電矜奇骨龍
自隨雲訂古交春逝花應添慘淡詩成誰與共推敲離亭
風笛聽嗚咽卻笑光陰客裏拋

花下有感作

碧桃花裏小雕樓闌外繁紅滯客留紫燕憐香飛逐伴黃
鸝驚豔語相酬誰能不趁當前樂只恐終成別後愁今夕

金尊拌一醉東風催土木蘭舟

夜泛芙蓉湖

九龍蔚紫翠明流澄暮景客心趁晚鐘水枕橫孤艇波闊
颺微風玳瑁鋪萬頃芙蓉無一花水木饒明靚咿啞柔艣
聲眠鷗驚夢醒酒闌夜三更新月墮西嶺蕭蕭楓樹林下
蔭漁莊靜微煙生柁樓折葦煮春茗灘聲霧氣中坐覺衣
袈冷峯隱石門松星蘸一湖影

遊寄暢園

名園惠山麓穿鑿得靈界石倣三島雲水分二泉派翠壁
出牆頭銀濤落天外旋折赴石罅就下必爭隘一宵春雨
深濺珠恣澎湃灩灩渟銀塘長虹臥鏡背淩虛倒塔影異

境沈其內亭紅花百重欄青山一帶危嶂立疑人孤松張
若蓋沙嶼奪雲明風簾搖日碎牆題過客詩屏暗何年畫
幽塢數雅歸虛巖學人話汲泉烹竹爐幽芬實堪愛淮海
舊清門流風已易代月泉撫畫圖吟社虛高會

前明中葉秦氏
結月泉吟社于

此沈石田爲繪
圖今藏予家

夜色盪波光明星如月大

訪東林書院

禍殘委鬼極天驚文運難同劫運爭講學原非亂世事殺
身纔副正人名尸填詔獄三光慘血暗神州九鼎傾瞻拜
遺祠餘慟哭壞牆猶殷管絃聲

艤舟亭

荒陂水一灣紅亭翼古渡蒼然夕陽外秀色蔚雲樹昔年

玉局翁雙橈曾暫駐
命宮守磨蝎貝錦遭讒妬
秘殿撤金蓮烏臺獄旋具
竄名黨錮籍幾爲作詩誤
瓊海悵歸來春夢倏已寤
買田孤宿願破驛淒魂寓
此間亦舊遊落帆領佳趣
修髯曳吟杖花逕想投步
宵人舒李輩朽骨萬口吐
蜉蝣逞飛揚安能保朝暮
芳蹤偶棲泊來者生景慕
欲去且裴回地重以人故
夜雨讀公詩心香燒一炷

遊青山莊偶題

蒼苔不雨滑如泥
徑複廊迴每易迷
楊柳亭臺山向背
杏花簾幙燕高低
好春半過無人賞
素壁全頽有客題
惆悵名流觴詠地
一庭煙月草萋萋

甘露寺

江光自古今鐘聲變曉暮初地一登臨勝概悉奔赴潮颶
海門雲天黏瓜步樹遠郭小于村遙舟浮若鷺入憩殿西
齋桐花落無數春蘚上階生茶煙到竹住石勒昔人名牆
書游客句偶凭戶北軒金焦水心露宛然石兩拳時隨浪
吞吐吳楚接蒼茫萬里一葦泝簇簇沙際人爭趁斜陽渡
飄颻長風來分頭峭帆去

很石行

甘露庭前有奇石踈伏如羊長數尺云是孔明與仲謀當
年促坐紆籌策遂成鼎足形果奪奸雄魄白馬江深斥堠
閒赤烏歲久烽煙熄微物重因人相傳成舊迹不知自何
年紅羊劫相戾致令雲根雲上天飛殺鑿寺僧好事生欺

謾易以他石加雕刻仍前位置頗妥貼以備弔古人游觀
物卽非真事所寄堪與餽羊一例無容刊我來登北固閒
入寺門步低徊對伏獬斑斑土花汗慨想三分時羣雄爭
割據俱懷逐鹿心誰悔觸藩誤霸圖嶽絕幾千年風景江
山宛如故獬兒業已消伏龍歸何處獨留此物存眈眈若
含怒朝伺金烏夜窺玉兔渴飲江聲餓吞霧安得黃初平
一叱卽奔去萋萋煙草山無數

鶴林寺

爲訪戴公山侵晨出北郭遙見古琳宮疎鐘度林薄門徑
竹修修涼風捲敗籜松敲石磴扶槐死秋藤縛佛殿建何
年層檐聳虛廓畫壁諸應真色相慈威各一覽盡數州更

登澗西閣石亂泉聲高窗虛峯影落當年劉寄奴龍潛此
栖託靈瑞早見徵飛來瑤島鶴境寂坐忘歸斜陽上簾箔
江聲繞寺門野花滿籬腳

招隱寺

身逐出岫雲未得遂真隱只餘登臨懷時被林泉引晚春
遊澗州名勝攬殆盡尙有古招提云與郊垌近雨餘煙嶂
開松門一停軫歲久鶴多馴地靈花不隕幽草但聞香新
篁未褪粉巖扉日杳冥澗戶風淒緊嶺高白雲深衣薄涼
難忍老僧延客飯山厨薦芝菌清游興有餘題壁豪方吮
如此好江山別去如飛隼

舟中望焦山

翠屏如削鐵萬仞插奔流海霧四時雨江雲一寺秋鐘聲
落鳥背風力轉潮頭試上層臺頂憑闌望九州

焦山

水國蒼茫影東南逼大荒驚濤催萬古元氣盪三光地陷
魚龍劣天浮島嶼長金烏波底躍依約挂扶桑

海雲堂

身忽近青天遙望意渺然樓高雲在下地窄水無邊石拔
蛟龍窟碑傳晉宋年老僧殊不惡解說養生篇

焦山瘞鶴銘歌

海門一島青如螺波光萬古森嵯峨胎仙羽化自何代製
銘立石留巖阿句奇字險神鬼忌雷電夜徙沈盤過岷濤

九派來浩浩怒聲幹地爭吞摩奇物焜燿水府內辟易百
怪驚蛟鼉龍女翩然欲出鱗每乘海月淩清波六朝遺蹟
最貴重數字價等千緡綳歸來堂中舊弄本犀珠磊落獨
得多

集古錄所載多
至百六十餘字

玩索字體近古隸結勢寬綽形委蛇筆墨

超逸得仙氣定以貞白當無譌滄州中丞亦好古情殷問
碣臨江沱是時窮冬水歸壑瑟瑟萬頃平鋪羅揮斥六丁
運神力剗薶搜苔掘曰科鐵索纏縛輾轉片片昇出呈
山坡紅泥亭子翼其上螭首隱壁無偏頗人間瑰寶任晦
顯名世豈許終煙蘿光芒字字煥星斗靈鵲化印龍騰梭
我來松寥尋舊蹟三隴坐臥頻撻莎文字鬱律屈杉柏波
磔劈髯森矛戈只惜俗工誤剗剔面目已失精神廟不如

偃臥龍淵底永全樂石免劫魔遙識江山風月夜令威飛
返空婆娑

焦山古鼎歌

元氣鼓扇五金汁海若嘯舞山鬼泣雲濤今古不得蝕龍
淵瑰寶無顏色劫歷滄桑古物遺夔文豕腹形離奇妙合
八卦聳黃耳上象三台翌紫微成周名卿曰世惠銘勲製
器開鑪錘義簡字奧意肅穆如見王庭錫命時東流窮壑
窺睂井江海之交留一鼎水古遙浮蓬島雲血殷微逗扶
桑影閱世三千事渺茫鈴山堂異海雲堂巧偷豪奪庸奴
技雨發風饕我佛傷冒傍銅山供鑄錯仍飯金界證圓光
吁嗟乎古鼎兮寶澤摩挲慎毋瀆神呵鬼守防折足物色

權門惜汝辱鎮壓名山全汝福

舟行阻風金山登妙高臺放歌

遙疑鼇戴蓬萊峯隨波來自扶桑東又疑博望乘槎迴自
牛斗虛一片支機之石遺在海門萬里巨浪鴻濤中江山
爭奇屹相向石腳截水水聲壯不知何年此駐兵至今折
戟沈沙上三日阻風舟未開披衣走上妙高臺安得春江
化爲酒澆我對此茫茫百端交集之悲懷瓜步華陽鬱烟
樹苻堅乃欲投鞭渡孫劉千古恨難平很石依然留北固
草草興亡了六朝橫江鐵鎖思無繆不及參軍一抔土碧
蘆紅蓼長蕭蕭落日昏黃畫角起眼底千江一葉耳聞來
費我百尺之絹三斗墨圖此天下第一江山歸置書堂裏

金山

江聲雜梵唱浪惡吼蒲牢潮起風驅馬山浮石冠菴只嫌
他嶂小不道此身高立久蒼松下清陰冷紵袍

登金山寺塔

足底山形縮波心地軸翻慈雲三界湧滄海一杯吞遠縱
難窮目虛搖不定魂御風如有術俯視日輪奔

題呂仙閣壁

峯危齒齒齧春潮百級迴梯到碧寥江遠欲平千嶂頂雲
來只在半樓腰手能點石何須羨枕可遊仙未許邀白鶴
自來還自去揚州無夢憶吹簫

尋海嶽庵故址

嶙嶙接天峯浩浩迴潮水文采照江山米家世濟美三絕
書畫詩愛古吸精髓環堵百畝宮幽居實在此因偕退院
僧杖策訪遺址墨池菰葉青茶臼土花紫破瓦露繡釘溼
苔拋缺徑長草烏頭垣垂木鼈子一梅蒿寄生雙柏藤
纏死初構規勝地三山列屏几天光瀉鏡中江色入窗裏
清吟月到牀落筆雲生紙奇石日摩挲袍笏拜於是彈指
八百年風流歇絕矣予抱耽奇癖高山歎仰止翰墨結清
緣珍秘芸箱底寶晉舊齋荒人遐室尙邇

贈彭明經晉賢

澤令

兀兀孤檠照素心選樓名氏重南金硯田不治三秋薄學
海無瀾千古深幸奉清塵揮羽扇偶彈絕散感瑤琴年華

暗逐江流遠無那新霜兩鬢侵

白門訪古集

登鍾山放歌

黃金嬴政此處埋雙峯並峙高崔巍蜿蜒如龍互起伏未
飛騰去需風雷江城春來一夜雨侵曉綠滿三山街我來
赤足踏龍背俯視諸嶂羅陪儻天風浩浩聲不息萬里吹
我襟懷開茫茫往事不可問但見江水明滅雲中來當年
蔣尉逐賊處時露遺鏃封莓苔偏安割據俱已矣酹酒往
勸長星杯遙憶南朝全盛日金蓮玉樹供歡咍君臣夜宴
期盡醉高燒蠟淚紅成堆銅壺漏滿夢未醒海日光早升
杲恩千門萬戶落花裏管絃到處飄樓臺長江一旦鐵鎖

落石頭又見降旛排至今惟有舊時月城下相送寒潮回
周駟棲息地故址生蒿萊吏隱兩寂寞千載遺嘲詼君看
謝公何磊落出處總繫蒼生懷園基賭墅若無事談笑已
報除昏霾兒輩成功安九鼎登臨絲竹常追陪閒值枯禪
論優劣北山未抵東山才

焉支井歌

白門城頭曉曉烏景陽宮裏醉黃奴如花侍女汲金井素
綆銀牀響轆轤無碍大會太極殿壁箋分韻開華宴璧月
瓊枝夜夜新女官狎客朝朝見圍城昨夜夢黃衣龍出蛇
分事已非禳災不解去禍水瓶羸甕敝誰能支童謡皂莢
相料理詔書十萬傳麻紙自憑王氣在江東牀腳奏章封

未啟隋師已渡朱雀航君臣相顧俱蒼黃下榻尚云自有
計繡龍畫雉黃泉藏勸君莫怨韓擒虎陷君坎窞緣歌舞
長江天塹尚難憑銀餅獨抱終何補井欄一抹胭脂同傳
是當年淚點紅何似杜鵑亡國恨年年嘸血向春風

周孝侯祠古柏行

孝侯祠中有古柏直上亭亭近千尺半株葉脫空槎枒半
株枝茂森矛戟移栽未識自何年數畝慘淡寒煙積應是
當年龍戰時千神萬怪助叱嚇須臾雨散雲亦收蒼龍闕
死歸不得尾掉青霄頭人地爪拳身縮恒偃立儻令回螯
一展舒拳攫應嫌天地窄邇來鱗鬣凋落盡只贖貞蕤纏
鐵骨色映簾櫳朱夏寒枝撐堂宇太陰黑地勝終應免斧

斯心香那怕遭蟲蝕曩哲英風塞兩間異物憑依靈所宅
孤忠戰沒鑿凶門千古烝嘗昭鑒格宛疑大樹號將軍恍
似甘棠思邵伯往往江城明月夜霓旌颯馬來遊集翠影
遙連鍾阜雲鬼狐潛遁鴟梟泣想見當年入水斬蛟時劍
氣塞空飛霹靂

臺城咏古四首

小住征驂訪六朝臺城閒眺欲魂銷廢園僧賣花時酒斷
瓦人拋竹鷗鷺能使盛名齊八友空將舊宅認三橋一般
贏得千秋在寺寺於今尙號蕭

務勤崇儉又何加所惜餘年溺釋迦贖得帝王偏有價作
來法會是無遮寡情佛不消魔鬼繞柱龍難弭鬪蛇淨業

那能除逆節白衣湯武謾矜誇

著述叢叢筆罕停布衣糲食涖天庭海中纔見紅鸞集殿
上旋聞白馬刑火果酣酣真足異聲當荷荷不堪聽至今
臺畔迷離草怨入東風分外青

龍瀆何人識遠模居然文學握天樞祥徵不獨麒麟至異
夢曾張天地圖芳草夕陽飛蛺蝶落花春雨長蘼蕪定知
死後魂猶餒麥飯無人薦一盂

板橋行

前朝故院秦淮曲春光一片傷游目澗浪危牆薜荔青香
姜碎瓦莓苔綠板橋舊迹失西東往事魂銷說不同填河
秋老遲靈鵲入月波遙駕彩虹聊按遺編頻想像鷺峯古

寺門相向小紅雁齒久消沈新綠魚鱗仍蕩瀟當時此處
最繁華比屋知名趙李家引住青鸞深院樹延來紅蜨出
牆花紅蜨青鸞情繼繼烹龍魚鳳開華宴檀板新歌燕子
箋繡衣競演桃花扇蘸甲香沈樂未央罽茵地上月如霜
玉花珍簞鋪鴛褥金縷銀屏掩象牀寇家姊妹年方少頓
老琵琶稱絕調芍藥闌前婪尾燒蒲萄架下纏頭勞良夜
爭來橋上遊赤闌干影漾澄流風翻菡萏開聯蒂沙暖鴛
鴦睡並頭無端小劫逢龍漢釵光扇影如雲斷裴航無處
問靈緣交甫何由登彼岸燕燕鶯鶯空自憐茶棚香閣付
荒煙柳梢月上疑妝鏡水面萍生想笛鈿歲久人鋤成菜
圃芳魂黑夜應相語樂府誰歌昔昔鹽長楊自作瀟瀟雨

雨昏深樹怪禽啼往往春泥露象篴竹在杜陵應問訊柱
殘司馬未留題葛顧葛嫩顧聲名最殊衆分飛嫁得桐花鳳
嚮日爭誇白紵詞於今何異黃梁夢一桁鍾山倚麗譙夕
陽畫角悵無聊可憐寂寞寒潮水流入長塘綠不消

過隨園訪袁太史子才枚先生不值二首

何處尋芳尙未還名園悄鎖水雲間池塘草長鶯啼樹門
巷松遮鶴守關江上春深翻碧浪意中人遠見青山彼蒼
位置奇才局清福如公竟不慳

誰甘風利便迴船應與林泉別有緣莊似午橋勝甲第歌
教子夜樂丁年客來題壁應非俗官許歸山便是仙清閨
閣應懸一榻異時借我白雲眠

訪嚴冬友

山窗曾記讀新詩木末停雲有所思甫也才名齊白也牧
之風調似微之半宵風雨交千古六代江山酒一卮聞說
秦淮春漲滿探花先訂泛舟期

雨花臺

法界諸天近遺臺在野坳江連三楚白山帶六朝青國用
供僧餉軍書雜梵經可憐空佞佛餒鬼乞無靈

莫愁湖

碧檻紅簾小小樓湖光一片盪蘭舟清游易逐閒情往勝
迹還因麗色留金翠六朝渾似夢煙花三月冷于秋白門
楊柳青溪水不信無愁卻惹愁

秦淮水榭雜詩二十首

經旬小住板橋西
水閣湘簾一桁低
愛殺綠楊窗外樹
曉風殘月有鶯啼

簫鼓向人蕩畫桡
閒居未覺客無聊
朝昏來凭闌干立
貪看桃花兩度潮

麗句清詞不染塵
舞衣歌扇逐時新
秦淮風月平分處
半屬才人半美人

紅蕉翠篠媚新晴
隔水雕闌倍有情
未識露涼風緊夜
阿誰簾底學吹笙

江城夜漏點初終
又聽迴光寺裏鐘
斜月半簾風悄悄
有人花閣夢方濃

放艇清溪暢客襟水雲淄淄柳陰陰偶從丁字簾前過便
覺閒情不自禁

徑草初深壁半敲舟人指點小姑祠蟲絲網戶無人過姊
妹花開滿破籬

白沙翠莢接波光邀笛相傳此渡傍三弄人歸何處去鷺
鷺梳翅立斜陽

偶尋江令舊池臺畫棟雕甍付劫灰山色不知人事改對
門猶自送青來

小樓舊是玉京家色藝曾邀祭酒吳梅村誇今日我來增悵

望重門深鎖馬纓花

桃葉當年古渡頭何人水調按涼州雕闌百尺窗三匝花

杪燈紅舊酒樓

簾幙低垂護石欄
深居仍覺客衣單
連朝水閣蕭蕭雨
花影迷離怯暮寒

誰家玉笛譜新腔
引我齊開水北窗
愛殺隔牆花裏燕
掀波來往總雙雙

興闌回櫂已三更
漸見城樓缺月升
何事鄰家涼不寐
水廳猶有一枝燈

梔子花前曲檻紅
如梳月上女牆東
隱囊小榻無聊坐
身在詩情畫意中

隔院箏聲靜夜聞
模黏涼月薄黏雲
微微風息初來處
花氣衣香兩不分

涼宵夢轉水西廳殘月穿簾照畫屏更鼓已停鐘未動輕
風閒蕩護花鈴

白門楊柳白門烏風景尤宜清夜娛花月歌樓燈舞榭分
明金粉六朝圖

木瓜花下遇何戡逸興閒情恣劇談題壁記時兼記事畫
閣同倚月初三
月光花影滿紅簾別院誰歌昔昔鹽無限風懷拋不得板
橋佳話試重添

馬湘蘭畫梅花便面歌

風催花信披單袷偶遊珠市逢珍筵物舊仍餘粉黛香年
多已損瑯璃匣淡淡松煤寫折枝分明西崦早春時橫斜

盡帶超塵思疏密俱含絕世姿展看知是閨房筆朱文印
篆棲霞室族本扶風清望家名分楚澤幽芳質瑤臺淪謫
墮平康吮墨研朱素擅長莫愁翠浪浮游舫舊曲紅樓捲
夕陽便面揮豪深有意無邊春色誰堪寄似謂冰肌玉骨
人原存傲雪凌霜致名流懷袖昔爭傳道與乘鸞可並妍
只應皎月同圓潔底慮秋風有棄捐一自波生桃葉渡舞
衣歌板全非故枇杷門巷鎖寒鴉楊柳池塘飛野鷺野鷺
寒鴉晝夜聞板橋煙雨易黃昏香銷仙蜨千團粉夢冷梨
花一片雲我來弔古鍾山麓漠漠秦淮蕩空綠難招零落
玉真魂惟聽淒涼瓊樹曲雲誇柳憚雪羊孚得及名姝墨
妙無空將賸水殘山意繪作橫烟挂月圖舊京最著馬昭

骨斑筠淚染湘妃血蘊藉如披林下風動搖恐墜庭前雪
小楷僉名整復斜滄桑劫外遇天涯畫篋重編名扇錄空
傳樂府唱桃花

遊攝山詩二十首

湖上

平湖攝山麓沍沍新雨足照影盡花枝春波不能綠

明徵君祠

石鼎青苔生神龕蛛網翳空庭古杪櫺時有村人祭

桃花澗

桃香撲澗中桃影沈澗底不是桃源人卻飲桃花水

疊浪厓

遠訝白頭浪滾滾捲蒼壁豈知太古冰風吹結成石

千佛嶺

如是千佛名一一出穿鑿山石縱有靈已被色相著

般若臺

莫以所居高佛法貴平等萬箇簌簌中一榻綠雲冷

紫峯閣

石閣捲簾時高下羣峯紫嵐翠溼相黏電光收不起

白雲庵

風停雲漸歸日暮僧初定穿破玉玲瓏經堂一聲磬

息心亭

蘿洞水泠泠雲門石崑崙花鳥忽齊驚小亭風一角

德雲庵

聞鐘啟竹扉春露溼臺殿怪底月昏昏銜山僅一綫

幽居

一泉白於雲萬綠深成海寄語草堂靈小隱吾將乃

禹王碑

在天開山卽
摹峒嶼碑

誰將斧鑿痕倣此龍蛇體由來太古文亦可駭山鬼

寺僧
云碑

可辟
邪

萬松閣

日出不能紅雨餘分外碧小坐冷森森疑是秋堂夕

春雨樓

一枝紅杏花空山豔新雨占斷無邊春江南此樓古

雲木相參閣

萬木擁春雲一望綠無罅不是風箏聲誰知有危榭

茅庵

茅庵踞山腰冷泉穿石骨盡日水聲中一鐙一古佛

白鹿泉

一泓涵太虛白鹿羣來飲何當折松枝石銚試春茗

鹿泉庵

曲澗小橋橫一庵背石礪山徑夕陽中歌聲下樵擔

瀑布

千尺赴厓根玉虹蒼壁挂經過幾層雲應是星河派

最高峯

杖撥浮雲開身出飛鳥外青冥漸若窮日色益加大

最高峯望黃天蕩弔韓蘄王

拍天寒江向東瀉帆小舟輕疾于馬長風捲浪壓高山銀
花飛迸林梢打蘄王往事劇悲辛舳艫旗幟橫煙津夫人
一鼓賊破膽惜哉走脫紅袍人罷戰中原事已去疲驢日
暮西湖路風景杭州勝汴州深宮夢斷黃龍戍當年折戟
沈沙灘千載英雄恨未完馳驅鐵騎風雲暗出沒靈旗霧
雨寒潮生潮落自今昔半壁神州虛一擲漁人見慣獨無
情坐背青山吹竹笛

龍潭

一峯陰暗一峯晴春晚龍潭道上行左右江山兩奇絕青

林不斷畫眉聲

舟行

篷背露猶溼船頭日已迎禽靈學人語樹偃礙帆行市屋
占橋頂松牌記驛程誰知村盡處忽有寺鐘聲

阻風

石尤風起泊沙灣雲亂長空鳥倒還贏得樹聲灘影裏篷
窗盡日對青山

陽湖門人孫星衍編校

靈巖山人詩集卷五

靈巖山人詩集目錄

第六卷 古今體詩

渡江吟草

江干

渡江

邗上喜晤程魚門

晉芳

魚門招遊平山堂因柬古詩一章

董子祠

過孔北海墓二十韻

昭明太子文選樓

隋苑

雷塘

玉鉤斜

邗溝

蕃釐觀

竹西亭

法海寺

禪智寺

天寧寺三咏

簡禪師爪髮塔

晉樹軒

青龍井

二十四橋玩月歌

康山

呈杭編修堇浦

世駿

先生

梅花嶺弔史閣部祠墓四首

紅橋曲六首

題高郵驛壁

灣頭

邵伯埭書晉謝太傅傳後

露筋祠

清水潭

瓦鋪店

漂母祠

韓侯釣臺

傾蓋亭

棗溝

蒙陰道中大風作

望岱嶽

罄陽

羊流店

石門早行口號

扁鵲墓

夜行趙北口

樓桑村

曉發琉璃河

蘆溝橋

燕臺遊草

黃金臺

文信國祠

萬壽寺

李元妃妝臺

遊香山

初抵都門家掌科咸齋

誼

先生館我槐蔭書堂

敬呈三首

贈夕照寺僧

般若庵訪友作

匏瓜亭

新秋旅懷四首

憩真空寺

甕山謁元耶律丞相墓

出北郊

滿井

秋晚薊門晚望有作

蘋婆果

橄欖

葡萄

橘

歲暮感懷

靈巖山人詩集卷六

鎮洋畢沅秋帆

一字縷蘅

渡江吟草

江干

極浦青蒼水拍天
孫劉戰壘夕陽邊
船頭浪立壓山頂
雲外帆飛出鳥前
鷗夢圓隨沙嶼月
鴻荒勢入海門煙
此身自笑輕如葉
臥聽龍吟學扣舷

渡江

數杵清鐘遠寺撞
水雲如墨壓篷窗
風頭初轉潮初落
殘月隨人夜渡江

邗上喜晤程魚門

晉芳

凌雲賦敵馬相如邂逅逢君開士廬林壑騁懷吟不盡金
錢隨手散無餘廣交座每盈談客有福人纔愛讀書肝膽
千秋茶一瓊二分明月照窗虛

魚門招遊平山堂因東古詩一章

畫舫出紅橋綠楊繞煙郭麗日媚晴川芳草襯雙屨十步
一園林五步一樓閣聊品蜀岡泉涼軒捲簾幕謾謾風韻
松英英雲漲壑珠帳綴紅櫻錦屏圍赤芍所欣素心友掀
髯逞諧謔萬疊隔江山翠影襟邊落尙留未了緣更訂他
年約待開東閣梅來跨揚州鶴

董子祠

石徑春殘長綠苔
元賢祠宇閉煙塵
下帷初不難三載對

策誰堪第一才，疊相驕王胥。感悟未陳留，稿啟嫌猜竹林。
盡日風蕭瑟，疇向虛堂問玉杯。

過孔北海墓二十韻

秀麥秋方至，黃梅雨易零。偶逢芳甸霽，驚見古墳青。斷碣
全無字，英魂定有靈。香泥埋俠骨，碧落託箕星。直轡行安
往，嘉謀世可經。貢才論驚鳥，憂士損修齡。獨木支廬剝，洪
鐘警夢醒。權姦紛舛午，國步歎零丁。志效傾心藎，羞爲守
口瓶。危言覩賊魄，蘊策翊王庭。切諫修時祭，深排復肉刑。
虛中非巨瓠，高爵笑浮萍。意氣凌諸夏，聲稱被八溟。所傷
蘭委雪，羣悼器遺型。運值屯遭際，人存社稷寧。毀巢終破
卵，埋照類乾螢。客有芻蕘到，尊餘椒柏馨。月輪來秉燭，雲

勢展園屏往行昭青史凝愁滿翠垌卓然脂習事高義動
彤廷

昭明太子文選樓

衡文傳帝子樓翼舊城隅金粉齊梁擅風騷楚漢殊一斑
窺霧豹千腋集霜狐豈似滕王閣空描蛺蝶圖

隋苑

川原繡錯晚晴新一碧平蕪絕點塵落日亭亭風舉舉楊
花如雪趁行人

雷塘

平岡迤邐水清冷雨過煙莎不斷青五夜陰燐常出沒還
疑重放舊時螢

玉鉤斜

此地經行最愴情
蕭蕭風捲白楊聲
夜深一片荒墳月
較與迷樓分外明

邗溝

吳王夫
差所開

粼粼涵碧抱城流
飛絮飛花送客舟
想見役夫疏鑿日
梧宮猶自未曾秋

蕃釐觀

曲徑轉深竹
飛甍切太霄
奇葩雕白璧
古誌勒青瑤
晨夕蒲牢吼
風雲羽衛朝
荷池通遠脈
芝圃茁靈苗
花鴿常來去
珠幢自動搖
欄高闕月竊
簷迴礙魁杓
石鼎無人賦
松圖有客描
磴盤防屐滑
香篆帶琴飄
爲問琳房侶
何時丹

竈燒底須登紫府試與話紅橋小跨雲中鶴來聽月下簫
游仙如借枕不厭夢連宵

竹西亭

最好紅亭首夏時千竿碧玉影離離六么方響花間集不
唱楊枝唱竹枝

百幅蠻箋草綠雲清狂我憶杜司勳今宵不負揚州住桂
醕千巡月二分

法海寺

輦道絕塵埃仙橋橫蟬蛸栝柏夾階除雲霞出檐棟鉅砌
隱蒼螭珠幢翻彩鳳經堂清磬流塔院一鈴弄殿古荷佛
靈松深涼鶴夢禪燈不用傳忍草非因種藥欄紅有芒桐

窻緣無縫客方貝葉繙僧進伊蒲供何年夙願酬小住一
龕共紀遊詩漫題歸櫂月追送

禪智寺

江郭雨初收松門景清絕淥沼冷而深紅廊修且折老僧
垂頭坐盛夏不知熱爐凝隔夜香茶煮去年雪詩源頗詳
審戒律復精切硯池一水凹庭石數峯凸柳梢蟬若琴屋
角月如玦靈旛開寶界法示廣長舌爲多塵世因嬾問無
生訣來非繡佛蘇歸效御風列

天寧寺三詠

簡禪師爪髮塔

慧業省無人勞師示解脫紛紛皮相徒曷不加棒喝塔院

夕陽中古苔青石骨

晉樹軒

高柯拔地起寂歷蔭僧寮疎簾掩清簾鎮日有涼飈六朝
雲一片傳來綠未消

青龍井

高僧昔駐錫設法持鉢咒俯窺空人心清澈冷碧甃有時
去爲霖一縷白煙逗

二十四橋玩月歌

揚州夢醒月明宵行露閒尋廿四橋僧寺煙籠鐘杳杳女
牆風定漏迢迢百尺紅欄排雁齒月隨人影沈波底鯨室
誰將菱鏡開龍宮欲採驪珠起碧海潮來沒綠蘋金波萬

片疊鯨鱗驚棲樹杪時飛鵲暗送衣香不見人當空桂魄
夜方半涼露無聲落天畔髣髴潛身傍玉臺盈盈一水通
銀漢月下飄然跨彩虹星收雲斂水連空何處吹簫移几
榻誰家擣素出房櫳擣素吹簫俱未寢悲歡勞逸同清景
小玉回燈翡翠屏輕綃倚杵梧桐井可憐游子向天涯恨
望層霄苦憶家衣上不知霜霧氣庭中只道疑

去聲

霜華

昨夜寒暄穿瓦縫玉錢到枕無心弄尺素難裁異地書空
牀徒照還鄉夢夢斷書沈又一時愁同月滿不同虧流光
初不分今古入世誰教有別離水底銀蟾天上兔影形萬
里還相顧豈如青鬢戀關河常令紅樓隔雲樹我亦孤帆
作遠遊經旬小住古邗溝壯懷輕視新婚別良夜翻成兩

地愁

康山

獄中片紙乞牽援枉已寧辭世笑言不是馬卿須狗監只
因蠶室繫龍門風流四海無同調心迹千秋可共原今日
青山橫一桁追尋無復讀書軒

呈杭編修堇浦

世駿

先生

彩翰宵飛星斗芒身閒不礙讀書忙名山天許司扶轂學
海人愁歎望洋中歲休官思作述驚才傳世在文章平生
每靳懷中刺此日低頭拜講堂

梅花嶺弔史閣部祠墓四首

渡江草草小朝廷仗鉞空聞白馬刑螭陸抗章爭黨錮鳳

箋簽詔聘娉婷黃巾奪印郊屯蟻碧血飛燐夜化螢幾輩
南都名下士可憐無淚灑新亭

警報沿江火急馳新聲燕子寫烏絲酒酣殿上徵歌日尸
立軍前飲刃時鐵鎖沙沈飛驢騎石城鬼哭出降旗九原
痛入忠臣骨說與漁翁總不知

危厦孤撐一木難弄兵四鎮突封猶上流爭議防蘇峻當
局誰知倚謝安手札史宥神護守

公復攝政王原書從皇史宥尋獲紙墨煥然如新編入通鑑輯覽

家書祠壁字淒酸

內府發山公遺像家書泐置祠壁

分明一擲成孤注指眼重

緇青史看

赤縣塵飛海水揚身隨明社共存亡東林一死傳衣鉢

公爲

左忠毅督學時所取士

南渡千軍缺斧斨龍戰靈魂追信國鵑啼血面

訴高皇年年嶺上梅花月照到窮泉骨亦香

紅橋曲六首

勞君相借問妾住在紅橋高閣百花裏門前挂酒瓢
聞說蕃釐觀瓊花天下無無心逐伴看只愛采薜蘿
雲際閣三層簾前花四照不解唱秧歌爲郎謳水調
暗卜心頭事攤錢向平地儻儂夙願諧箇箇全呈字
三五紅牕女瓊簫日三弄不是愛清音圖引丹山鳳
茅庵大士靈辨香往所祓製成金縷衣夜向熏爐爇

題高郵驛壁

秧田水綠竹園青古陌彎環響馱鈴領取行程好風景煙
林斷處露郵亭

處處連耒打麥聲江村日暖午風清紅閨屈指應相憶人
在青山第幾程

灣頭

松棚板屋兩三家瓦鉋甌爐各賣茶愛殺雞豚游息處金
銀開遍滿籬花

邵伯埭書晉謝太傅傳後

東山高臥人經世才無兩昔鎮廣陵時河流苦漫漭紆策
爲蒼生鳩工聚黃壤縣縣數十里埭面平如掌蓄洩隨時
宜田畝獲豐穰功制蛟龍狂利便古今享我行仲夏初瓜
蔓水新長河湖中斷處玉虹橫萬丈迢迢垂柳陰嚶嚶鳴
蛭響淡紅霞四分遥白鷺雙上六朝名士風綏轡寄景仰

書生儻用世舍公將安倣一時小草名千載甘棠想

露筋祠

夏木濃陰帶古祠休論往事是傳疑去來南北人多少下馬惓惓盡賦詩

清水潭

黃河水至此始清

九折纔過勢漸平底須膠擾始激清自慙正向東華去不復臨流想濯纓

瓦鋪店

綠樹煙屯見遠村鴉歸一一近黃昏征途未是無同伴山月隨人入店門

漂母祠

誰知千載後香火盛荒村我陋千金擲人高一飯恩感應
深國士世豈少王孫聽唱神弦曲靈鴉噪曉昏

韓侯釣臺

釣漢先釣魚魚得足餬口恰笑英雄人乞食向漂母國士
作真王百戰功居首謀疎命轉制牝雞力盡身還怨烹狗
嗚呼韓侯命不偶死生全繫婦人手釣魚磯蒼蘚厚清淮
影蘸數株柳帶礪山河誰可久茲臺亙古爲君有我哀王
孫酌杯酒一語問君君悔否曷不長此坐垂綸頭銜獨署
煙波叟鐘室年年草血紅底須肘間金印大於斗

傾蓋亭

軼事傳聞孔與程相逢心與蓋同傾而今杯酒論交者轉

眼何曾記姓名

棗溝

暫憩山村賣酒壚
小娃勸客且維駒
前村儻去天將雨
夏木陰陰喚鶉鴣

蒙陰道中大風作

驅車古顚輿四望忽陰曠
未來先有聲大塊遙噫氣排林
向北傾捲水從西逝巨石欲騰空
積雲時撲地原野罕人行
村墟各門閉僕夫目屢迷
奔馬足頻躓望望逆旅投聊
效爰居避蒼黃過蒙山
風姨威稍霽得非鞠陵內
折丹日沈醉偶妄擊颼輪
震掉作淩厲否則北溟鵬
方圖南徙計九萬里扶搖
垂雲展金翅不知此一時
已到天池未

望岱嶽

峻極蟠齊魯青蒼絕境躋秩開五等貴勢壓萬山低生物
功能鉅參天道自齊云亭封禪舊不必問金泥

鰲陽

山徑歸黃犢村農語綠煙稻畦暑雨候茅店晚風天此處
二三里相傳四十泉何當暫停轡徧試竹爐煎

羊流店

羊叔子故里
今名楊柳店

羊公遺愛繫人思不獨襄陽墮淚碑偶過道傍楊柳店紙
窻泥壁盡題詩

石門早行口號

星搖風滿天露下月沈樹馬蹏側側聲數里踏沙路近關

有荒祠先賢會
處時平門不扃
長夜人來去
戍樓角一聲
白發海東曙

扁鵲墓

壠樹摧殘馬鬣隤
古碑斑駁繡蒼苔
無緣不共長桑去
失計輕過太華來
豈料厲鍼砥音脂本史記石術翻成賈禍養殃媒
相傳墳土堪祛疾
難免人常盜一坏

夜行趙北口

日短客程遠
初更車未停
烏啼殘月冷
魚上晚風鯉
鋸齒千重嶂
琴徽數點星
四方吾輩事
未敢說漂零

樓桑村

吾來樓桑村
不見樓桑樹
日落桑柘間
英雄在何處
飛灰

壓城高畫角吹淒楚牧馬暗不鳴新蟬樹巔語炎精祚已
移羣雄競割據蜀主起艱難奔竄蔑寸土尙憑威斗靈義
旗應運舉君臣契魚水將士猛龍虎雖由知人明終以堅
忍故至今荒村中萬木莽回互桓侯起屠沽英靈肅祠宇
縱橫丈八矛影照井泉古

此首上去二音
互押偶本唐人

曉發琉璃河

房山月黑天靄霜龍泉雨腳吹笙簫行人曉發琉璃渡心
憂雨至渡口長須臾霏微雨氣散歛見林木清蒼蒼朝曦
一抹上林表橋長緜互橫隄旁橋下清流細如縠橋邊榆
柳疎成行荇藻牽風動要裏鵲貼水紛翺翔是名琉璃
良有以玲瓏翠采相輝光安得并州快刀翦翦此一幅藏

奚囊分風劈月取其半歸來嵌以七寶裝是河源頭出上
谷桑經聖水經良鄉一名六里一劉李宋錄金史都茫茫
常年六月水勢漲往來極目愁汪洋橋西鐵竿是何物與
橋長短畧等量誰歟立此鎮雄怪毋乃治水遺禹王何人
附會王彥章鐵篙之說因鐵槍齊諧莊子尙如此無怪世
俗多荒唐摩挲一笑下橋去溪流湛碧溪風涼

蘆溝橋

拒馬伏流純浸黑屈曲懷來兩山石出山一怒走狼窩激
浪冲波拍天白石景山東土脈孱明初屢爲京師患環隄
築橋嘉靖年橋成之後隄始堅橋長二百有餘步石琢獅
子爲橋欄橋下沙橫少舟楫橋上雷車響漶潛鳳城咫尺

近魁杓南北衝塗第一橋
瀕洞塵沙迷曉夜往來冠蓋接
雲霄殘月曉風楊柳岸雞鳴茅店疎星斷一絲鞭影裏清
波照見行人鬢毛換

燕臺遊草

黃金臺

峩峩黃金臺四面皆蒿萊黃者葉青者苔感不絕余心懷
昔聞燕昭王慷慨輕貲財築宮於此事郭隗黃金千兩置
臺上卑礼厚幣招雄才樂毅鄒衍劇辛接踵往如水赴壑
聲應響就中獨有望諸君無雙國士超羣倫下齊七十城
擢如電掃雲報讐雪恥天地驚齊器設寧臺大呂陳元英
故鼎反磨室汶篁植燕京馳驅感激揚聲名慨然立此不

世勲將軍功高海內懼惠王疑之羣臣妒從來反間起猜
嫌豈爲田單有遺悞噫嘻乎君臣遇合鮮有如此者後人
那得知其故功成不成乃天數將軍一朝去古臺亦荒涼
至今臺畔過惟見皓月凝空蒼悲風蕭條出枯桑殘陽明
滅煙水長客從何來淚盈把短衣數挽不掩踝黃金臺下
寂無人太息爲言千里馬

文信國祠

趙家半壁土陸沈無寸疆六飛遁瀛海君臣聚一航偉哉
文信國與宋相存亡毒流淳祐間朝廷漸披猖前有史太
師後有賈平章宮闈挾戚里閭馬推丁當民謠白雁來江
潮死錢塘六橋花柳地變爲百戰場一葉泛九鼎其亡繫

苞桑公銜兩宮命意氣殊慨慷羈留不辱命間道奔維揚
遂集勤王旅彎弓射天狼乘勝復江右師旋敗循陽收兵
出麗浦稍稍嚴軍裝賊舟導宏範襲執五坡岡索書招世
傑鏖戰零丁洋厓山旣破滅南冠逐鬼倭區區設供帳聒
聒沸蜩蟬生殺雜喜怒四顧都茫茫長揖不肯屈八日斷
水漿沈疴服砒毒帝遣不得僵待公至柴市天地生輝光
埋頭死獄底豈若撻鉅鉞丹心冒霜刃碧血流堂堂乾坤
一震動白日幽州黃都市忽晝晦塵沙莽飛揚愁雲壓城
黑列缺崩碎磅至死不受封狂飈擺雷碾改書宋少保豁
然吐朝暘諸天各失色避席開金閭隱隱列虎豹翾翾聞
鸞鳳迎公反閭闔位置日月傍請公但安坐爲天主綱常

人生誰無死天壽齊彭殤晞如龕上露倏若春前霜宛轉
兒女手魂魄羞迴遑幾微稍牽顧艱危遂彷徨如公死不
朽青史流芬芳科名真不愧聲伎原無妨從容赴大義如
客歸其鄉公志已早斷吞刀截胸腸不須王炎午生祭文
激傷不須謝皋羽西臺哭浪浪炯然留一心百鍊成堅鋼
臨危出衣帶甘字義周詳一篇正氣歌浩然塞穹蒼想見
公生平自命實有方三年錮狴獄浣花擬歌行淵淵金石
聲鏗鏘發銀鐺引頸盼鼎鑊擊節歌清商其文何悲壯其
氣至大剛收拾殘宋局臣節豎大防齋心謁祠廟百拜陳
椒觴衣冠儼秀發劍佩森翱翔公貌清而腴豐頤翼脩顏
雙瞳翦秋水顧盼含悲涼精誠動恟恍靈旗颯颯颺寶祐

登科錄片紙重琳琅同朝幾鉅公差殺留

夢炎陳宜中王

應麟

余家傳墨寶錦綈護青箱遺像附家書翰墨森光芒
精靈貫虹霓元氣相扶將金元往事遠紫海迴瀾長公如
在地水終古流湯湯杜鵑叫冬青陵骨遺民藏天荒地老
後公恨猶未央一死畢萬事星嶽爲低昂成仁兼取義孔
孟道始彰

萬壽寺

秋風吹雙屐訪勝出國門微聞翠微磬稍轉斜陽村新涼
袷衣輕花路入初熏玉河挹紺宇突兀撐清旻上方壘奇
石崦靄連雲根古洞仿鷲嶺以奉三世尊莊嚴開金界花
雨墜繽紛其上有廣榭其下有文軒神宗昔駐蹕尙食於

此間殿頭礙五雲殿腳穿三泉重樓與複閣髣髴移瀛寰
七松走蛟虬不知種何年烏兔受障蔽四序生幽寒吾聞
馮司礼奉敕經始焉風霆佐揮霍倏忽開梅檀金錢糜無
數日夜窮雕鐫碑文出江陵敘載亦可傳模黏剔苔蘚字
畫雜缺完寺有萬石鐘丈二青斑斕文皇時鑄此蟲鼠慵
高眠鎔鑄貝葉文筆法頗清妍榮國實佐命袞袞領朝官
和尚知自誤功成歸空禪範金豈無意懺悔求諸天聲聞
數十里諸天默無言彈指閱浩劫蒲牢臥蒼煙靜參寂妙
旨俯仰正茫然徘徊日西匿飛鳥相與還平川黯將夕粥
鼓聲猶繁衣上見新月玉泉響濺濺

李元妃妝臺

昭明觀後百花開柳彈鴛鴦舞蝶來此是元妃歌舞地人

傳蕭后曉妝臺大定末年臺始造臺高只在瓊花島臺前

月傍九霄明

妃與章宗露坐上曰二人土

上坐妃應聲曰一月日邊明臺上香飄五雲杪元妃

當日最承恩紅袖烏絲奉至尊

妃頗通文義

獨對中天譚皓魄全

通小史辨金根內家嘖嘖爭誇豔粉黛胭脂一朝賤也同

密誓賜金鈿那怕秋風棄紈扇同時張建教宮嬪色藝傾

城第一人不信玉音嬌似鳳試看紗帳薄於雲一朝恩寵

誰能數楚舞吳歌齊卻步微聞天語喚師兒翻使良家羨

監戶此時風景正清幽金屋妝成孔雀樓樓上樓前盡珠

翠曉光遙控珊瑚鉤紅豆啄殘鸚鵡嚙妝臺斜立深屏淺

霧鬢雲鬟寶鏡偏雕欄繡幙春山遠驚心回首玉惺忪引

手花枝落幾叢花落鳥嘯成已事殘妝滿面夕陽紅閒緇
舊史閒憑弔芙蓉依舊臨波笑古觀棲鴉不住嘯妝樓夜
月還相照單登乙律事荒唐瀛海方壺更渺茫

西元集舊傳還
太后梳妝臺前

有瀛洲方壺玉
虹金露四亭

莫唱同心春院曲朦朧樹色隱昭陽

遊香山

太行環斗樞蜿蜒數千里西郊天尺五萬山突而止奧境
闢香山琳宮倚雲起初名甘露後永安中有夢感泉洄洄
香鑪一峯最陡絕時見靈氣相縈結金臺丹井跡猶存鷹
爪蟾蜍石羅列蓮峯出化域瓣瓣蘊青冥神靈鬱奇秀變
化無停形蟠空直上翠微路黛翕藍霏不知數危峯側磴
攀確斜曲檻迴廊往來誤白雲踏破不知高款人幽鳥啼

清曙天風颯颯細雨飛松花松子落我衣泉鳴幽澗聲淒淒
淒殿鐘欲動月色低須臾日出西山曉旛底石壇靜杳杳
遙看鳳闕五雲中吉祥雲湧三珠島

初抵都門家掌科咸齋

誼

先生館我槐蔭書堂敬

呈三首

蹇驪席帽意昂藏秋雨鞭絲指路長人羨陸機初入洛我
誇鄒衍去遊梁匣韜鳳唳琴沈響壁嘯龍泉劍吐芒自笑
空山麋鹿性濫竿底處著疎狂

楊掃塵清綠影交閒來舊學費推敲敢期汗血駒千里謬
許爲儀鳳九苞觸石雲還思故岫投林鳥暫得安巢吮豪
擬獻明光賦未必心甘等繫匏

西京門第本支親仙骨飄飄海鶴身公望久窺焚後稿家
風偏愛甕頭春詩傳外國雞林貴筆落中書鳳綽新曾侍
螭頭司執簡貞元朝士更何人

贈夕照寺僧

地接平泉勝閒尋法界來薜廊埋斷碣菜圃賸荒臺偶爾
逢羅什因之問劫灰晚涼陣陣雨催放白蓮開

般若庵訪友作

何因來物外訪友暫盤桓苔色經幢古泉聲塔院寒雲中
聞笑語松際有闌干畫壁前朝像丹青落彩後

匏瓜亭

小小紅亭木石環半臨溪水半銜山命名想見前人意甘

繫秋容老圃閒

新秋旅懷四首

一鴈催歸客宵聽斷續聲金風逢七夕玉杵記三生病葉
無因墮幽花向晚明夜來愁病酒反側過三更

木葉蕭蕭下溫經閱曉昏松篁新過雨門巷靜于村古井
聚秋氣閒窗上蘚痕平生羞挾瑟無技著王門

廳古燈收焰風輕幕漾波客吟因病減鄉思入秋多干祿
終何補論文不厭苛形容青鏡在原算未蹉跎

有客婁東至敲門駐小車忽通慈母訊直抵萬金書松菊
欣無恙蓂殮幸有餘怪來晨色裏靈鵲下階除

憩真空寺

玉河環繞古僧寮
蕉覆迴闌綠影嬌
齋鼓動時馴鴿下
戒壇扃後定香消
乞花樹小連泥斲
煮茗柴生摘葉燒
日射觚棱金雀影
琳宮璀璨麗層霄

甕山謁元耶律丞相墓

草昧文章正則乖
手扶斗柄上雲階
得時道自高松雪
議諡榮還並魯齋
開國鴻謨關間氣
上都名士鮮同儕
我來再拜陳雞酒
高冢麒麟半土埋

出北郊

遺基傳是古鷹房
狐兔年多尙避藏
羊角風高林葉盡
平沙日落斷雲黃

滿井

徑五尺餘清泉突出冬夏不竭好事者鑿石開東之水常浮起散漫四溢

莫慮常招損虛沖是此中只因源獨遠所以出無窮不仗
牽援力能施潤澤功石亭桐影裏滑澁土花紅

秋晚薊門晚望有作

斷雲隨雁飛遠嶂與天接日暮土城闕卷地風獵獵石橋
斷人行一一下紅葉

蘋婆果

誰摘煙林月秋來味倍腴涼探青鳥卵綠墮草蛇珠名可
儕香祖珍堪匹木奴幾時新被酒紅暈透芳膚

橄欖

予口不辭苦人心豈遽甘有時逢骨鯁漸欲當香含綠茗
好同試紅鹽每競探竭來憑棐几書味靜中參

葡萄

串串綠珠涼堆盤任飽嘗仙醪同醞釀宮錦想文章上苑
時新薦遐荒異種良若爲司馬渴不更羨瓊漿

橘

火鈴懸萬箇赤帝擲炎方不賦千端絹來看九月霜貢經
神禹定頌帶楚騷香堪笑漆園吏無端譬百王

歲暮感懷

空齋捲幔雪初晴坐擁重衾百感并一笑拈花應有悟三
年刻楮尙無成寒暄世態輸飛雁貧賤交情戀短檠最悵
今宵孤客況縈迴慈夢不勝情

靈巖山人詩集卷六

秀水門人王復編校